

Egitekoa

Albiste bakoitzari bere **izenburua** aurkitu behar diozu. Lotu letrak eta zenbakiak e erantzuna laukietan, adibidean bezala. (2 izenburu soberan geratuko zaizkizu).

A

Azken asteotan polemika sortu dute Ryanair hegazkin konpainiak dirua aurrezteko indarrean jarri nahi dituen neurriek. Ez dirudi, ordea, oraingoz gauzak hain gaizki doazkionik. Lehen hiruhilekoan, apiriletik ekainera, 136,5 milioi euro irabazi ditu, iaz epe berean baino ia zazpi aldiz gehiago. Erregaiak merkatu izanak lagundu dio horretan.

B

600 metrotik beherako sakoneran bizi den *Macropinna microstoma* espezieko arrainek oso begi bereziak dituzte: aurrekoa, goikoa eta behekoa ez ezik atzekoa ere ikusteko ahalmena dute. Kalifornian egindako ikerketa batek agerian utzi duenez, izan ere, burua gardena du espezie bitxi honek; zientzialariak orain ohartu dira noranzko guztietara begiratu ahal izatea dela horren helburua.

C

Azken aldian areagotu egin da animalien gaitortasuna, eta maskotak dituzten pertsonen artean gaitortasunak kutsatzeko gero eta beldur handiagoa dago. Baina ikerlariek diote okerragoa dela eskuak ez garbitzea txakur batek aurpegian miazkatzea baino.

D

Energia nuklear tradizionala fisiozkoa da eta hark sortutako hondakin erradiaktiboak gordetzeak zer arazo sortzen dituen ezaguna da. Hondakin nuklearen gordeleku asko bete-beteta daude eta gehiago topatzea oso zaila da.

Itxaropena fusio nuklearra da: ez du ez CO₂rik ez hondakinik sortzen. Orain Texas-eko Unibertsitateko ikerlari talde batek esan du fisioz sortutako elementuei fusioaren printzipioak aplikatuz elementu erradioaktiboak desagerrarazi daitezkeela, eta lortu egin dutela, gainera. Nola? Ez dute esan, baina egia izanez gero, energia nuklearrari izugarritzko bultzada emango lioke.

E

Kontrako noranzkoan zihoan auto batek beste bat jo eta hiru lagun zauritu dira gaur goizean Donostian. Suhiltzaileek adierazi dutenez, 6:40an gertatu da istripua N-364 errepideko 0 kilometroan. Biribilgunean kontrako errailean sartu da autoa eta bestea jo du.

Norabide zuzenean zihoan gidaria erietxera eraman dute, zauri larririk gabe, eta beste autoko bi pertsonak istripuaren lekuan artatu dituzte, zauri arinak zituztelako.

Suhiltzaileek jakinarazi dute puntu horretan istripu asko egon direla.

F

Aranzadi Zientzi Elkarteak Arrasateko Lezetxikiko aztarnategian indusketak egiten ari da hamalagarren aldiz, eta aurreko Behe Paleolitoko hartz baten bi hezurdura oso eta gizakien tresnak aurkitu dituzte. Aranzadik proiektuarekin jarraitu nahi du, "oraindik %20 falta baita induskatzeko". Jose Migel Barandiaran izan zen haizulo hori ikertzen lehena, 1956tik 1968ra arte.

G

Orain arte ezagutzen ziren zulo beltzen tamaina eguzkiarena baino milioika aldiz handiagoa da. Baina Frantziako Espazio Izpien Ikerketarako Zentroko astrofisikariek adierazi berri dutenez, eguzkiaren masa baino 500 aldiz handiagoa besterik ez den zulo beltza aurkitu dute Lurretik 290 milioi argi-urtera.

Zentroko Sean Farrell ikerlariaren arabera, zulo beltz handiak zulo beltz ertainen arteko elkarketaren ondorio izan daitezke; beraz, egiaztatzeko bidean izan daiteke orain arte teoria hutsa izan dena.

H

Hamar pertsona osasuntsuren larruazalaren hainbat zati aztertu ondoren, bakterioei zegozkien 112.000 sekuentzia genetiko identifikatu zituen zientzialari talde batek. Gehienak besoan zeuden; gutxi, belarriaren atzean.

Lotu izenburuak eta albisteen letrak eta idatzi erantzunak beheko laukietan, adibidean bezala (bi izenburu soberan dituzu).

ALBISTEEN IZENBURUAK

Adibidea:

0. Galerak saihetsi dituzte

1. Biltegi kutsatuen arazoari aurre egiteko aukera
2. Oraingoan garrantzi gutxiko ondorioak leku arriskutsuan
3. Norberak neurriak hartzea onena, besteren beldurrik izan gabe
4. Oztoporik ez alde guztietako irudiak hartzeko
5. Bi hartz gutxiago gure mendietan
6. Lurpeko altxorak ez dira agortu
7. Gorputz adarra kokagune nagusi
8. Txikiagoak elkartuta handiak sortu ote ziren ikertzen
9. Eguzkiaren masa handitzen ari da

Aukeratu testuen izenburuak eta idatzi beheko laukietan, adibidean egiten den bezala.

A- 0	B-	C-	D-	E-	F-	G-	H-
------	----	----	----	----	----	----	----